

# WEURDJE VANNE VORST



Leef luj van Kinder, **ich bèn bliej det gèe ter zeetj!** Waat is ei dörp zönger kameraodsjaap, vriendsjaap en leefdje? Hiëlemaal niks!

Daoveur is het good det wèe aaf en toew d'n tiéd pakke òm same te zeen. Biej kalle, lache, fiëste, geneete van de sumpel dinger in het lèeve en ins gek doon. Dich verkleije en vastelaovendj veere!

Op 11 november gaave wèe het startsjot veur de karnavalsdaag diej kômendje woore. Al jaore same op 't Dörp en al jaore mèt ein echt pleinfïest! Wèe zeen vriëd en gruëts det det ouch al jaore gebeurdj in het gezelsjaap van 100 tot 150 men, vro-luj en kinjer. En dao is good noëts: òs Dörpsplein is gemaaktj òm zeker het drijdöbbel te kinne verdrage! Ich wil den ouch eederein biej deze alvast oëtnuëje òm volgendj jaor op de 11dje vanne 11dje ins aaf te kôm op het dörp. Gèe zeetj ouch van harte welkôm en **wèe zouwe bliej zeen es gèe ter zeetj!**

Op de twiëdje zaoterdig van ja-newariej kwaame iëst **Jeugdprins Kyrann 1 en Jeugdprinses Jutta 1** oët de doës, nao ein geslaagdje Kinjerzitting. Veur de iëste kiër deej òzze Jeugdtraod det mèt ein echt verhaol, en dao moge ze gruëts op zeen! Good gedaon en volgendj jaor gaon wèe nog miër verstèldj staon van

waat dees jöng Rabbedabbers nog veur òs in petto hëbbe, dao bèn ich zeker van!

Saoves belèefdje ver- volges nao ein prachtige Prinsezitting – drök! – òs noëw Prinsepaar heur ge-boorte: **Prins Hendrik 1 en Prinses Kim 1!** Es Vorst bèn ich ter zeker van: mèt dees jokers diej ich speul staon wèe in Kinder en op tal van anger plaatse veur formiedabel vastelaovesdaag. Sjrief het uch op in vètete lètters: op **vriëdig 9 fibrewariej** zètte wèe **Radio Monza** weer oppe kop mèt de dialektjoëtzending tösse 16 en 23 ore. Stöm massaal aaf op 106.5 FM en geine zeiver: ouch diej waat hunne tillevisiej neet kinne misse dreije mer ins aane knupkes tot Monza opstuit dèen aovendj! Of kôm aaf nao de kantien! Op **zöndig 11 fibrewariej** trèktj vervolges òs **groëte stoet** door de Kinderse straote. Ei prachtig evenementj boë-op wèe uch allemaal verwachte. Naoderhandj veur de lèste kiër d'n aoje fômfarezaal in, want volgendj jaor liktj dèe plat tege de gröndj. Op **maondig d'n 12dje** trèkke wèe mèt ei mômbackkes oppe soëts of ei sjik pekske aan nao **Sporttaverne De Sjans** veur het **Verklèdj Bal** en op **woonsdig** is het weer **hiëring happe inne Kinderse kaffees** Het wiekendj trop stuit op **zaoterdig 17 fibrewariej** ei lèste Kinders karnavalsfiëst veur dit seizoen oppe plening: **het**



41<sup>ste</sup> jaorgank

# RABBEDABBERS 2018



## MÈT IN DEES EDISIE ÔNGER ANGERE

- Kinder meist hartveilige dörp van 't landj!
  - Fômfarezaal 2.0 inne steigers: wèe keeke alvast de planne in!
  - Het bèste van Grenslanj Aktuweel!
  - Gordon geit trouwe mèt eine oët Kinder!
- ... en nog veul miër sjèele zeiver!

**Prinsebal van Prins Hendrik 1** geit den door inne **fômfarezaal**.

Leef luj van Kinder, kôm massaal bo-ete dees daag en doot gezellig mèt òs mèt. Dink ter good aan: **Vorst Mark en ziën Rabbedabbers zulle bliej zeen det gèe ter zeetj!** En ich weit het zeker: det zultj gèe achteraaaf zelf ouch zeen, es gèe in uch eige zègtj: "Waat waas det weer ei fiëst!"

Jeugdtraod Alaaf!  
Rabbedabbers Alaaf!  
Kinder Alaaf!

**Vorst Mark**



# PROKLAMASIEJ PRINS HENDRIK 1



Gedaon te Kinder inne sporthal oppe 41e prinszitting van 13 janewariej 2018 door ugge 41e groöte prins van de Rabbedabbers van Kinder, Graaf van de Goërterhuuskesstraot, Hertog vanne Noordhook, Baron van røwwen olie, petrol en naft,

Mèt de grasijsie vanne Veurzitter en miëne veurgandje Prins, mèt de zèege vanne aod-prinse verklaor ich hiejbiej vandaag miën èllef punte.

Ugge euvergelökkige  
**prins Hendrik den 1e**

Miën leuze veur dit jaor zal dèn auch zeen :

*Ich kin veul,  
mer neet  
heivis!*

**TEN IËSTE:** Ich, Hendrik Neyens, bèn vandaag zoë fier es eine geeter. Want ich maag uch vertèlle dèt ich dit jaor door het lèeve kan gaon es

41e groöte prins vanne Rabbedabbers van Kinder es : Prins Hendrik den 1e !

**TEN TWIËDJE:** Allein is mer allein, en det is bij mich gelökkig neet het geval. Aan miën ziej stuit dit jaor: Prinses Kim de 1e !

**TEN DÖRDJE:** Miëne biejnaam is Veus, ômdet ich vreuger geër knoejdje mèt beustel en vèrf bij het make van eine karnavalswage, Es Prins laot ich noë diej wirke aan anger euver. Ich gaon mich dit jaor keuninklik gedrage!

**TEN VEERDJE:** Ich höb bjôs aane koëj 3 vroluj røndj treepele, en ich gaon nao het wirk geër ins wanjele mèt ein teef, Meistal pak ich den d'n høndj mèt!

**TEN VIËFDJE:** Ich woën oppe Goërterhuuskesstraot, ein regelrechte villawiëk, Eine Prins van dao, veultj zich in zoë eine naober de keuning te riëk!

**TEN ZËSDJE:** Oppe Noordhook teikene ze veur eine aardige ômzèt aan Jupiler en Hoegaarde eeder jaor, Ich zal miën oprit en de veurtuin ôntruëme, den zètj INBEV dao de kammejao mer klaor!

**TEN ZEEVENDJE:** Veur de kost zit ich tot aan miën kneuk inne petrochemie, en det is neet bepaaldj rok en rol, Mer ich ben dus waal eederen daag inne olie, wèe doon de bak good vol!

**TEN ACHTSTE:** Miën 2 kinjer zeen bij de Chiro, gein plaats veur lang neegels of meejk-up, De kleinste is ouch nog muziekaal aangelag, en goejtj es All Star mèt kløppels bij de stekkekup!

**TEN NEEGENDJE:** De kameraøj vanne Sjaaimakers zulle het dit seizoen zønger mich mōtte stèlle, Want dit jaor goej ich van oppe Prinsewage mèt kermèlle!

**TEN TIËNDJE:** Zètj uch de karnavalsdaag van dit jaor mer mèt dikke stift in ugge agenda en regeltj mer al get mèt ugge baas, Ich røeken op eine formidabele opkōmst, wèe gèeve same volle bak gaas!

**TEN ÈLLEFDJE:** De kōmendje 365 daag bèn ich ugge groöte Kinderse Prins, wèe zulle fiëste euveral, Haoj uch mer allemaol klaor veur eine prachtige karnaval!

# PROKLAMASIEJ

## JEUGDPRINS

### KYRANN 1 EN

### JEUGDPRINSES

### JUTTA 1



#### TEN IËSTE:

Ich bèn  
Kyrann

Caris, zoon van  
Jurgen Caris en  
Anneke Dirkx. Mer  
vanaaf vandaag maag  
eederein mich aanspreeke es  
Jeugdprins Kyrann den 1e!

**TEN TWIËDJE:** En ich bèn  
Jutta Meurs, dochter van Marc  
Meurs en Inge Brouns. En vanaaf noë  
tot volgendj jaor rëndj deze tiëd, heit ich  
Jeugdprinses Jutta de 1e!

**TEN DÖRDJE:** Es mien mama mèt de vastela-  
ovesdaag beloofdj gehaktbölkes klaor  
te make in temattesaus, Gèef ich 4 daag aan  
ei stök gaas wiej eine koekwaus!

**TEN VEERDJE:** Det is hiël erg lekker,  
Jeugdprins Kyrann, det huërse mich neet zègge,  
Mer ich laot mich toch leever get fritte in 't fritvèt lègge!

**TEN VIËFDJE:** Miën hobbie is raoze op het voetbalplein, bij  
Maaslandj NO aan de Hoverstraot, En achter ei paar jaor speul ich bij  
ein ploog boëveur gèe get wiejer eweg nao het stadion gaotj!

**TEN ZÈSDJE:** Ich zit bij de All Stars en bij de Chiro, ei drök lèeve, En noë  
nog ein ekstra taak: es Jeugdprinses Jutta gaas gèeve!

**TEN ZEEVENDJE:** Ich woën op het Scheyerveldj, doa is plaats  
genôg ôm ei fiëstje te veere, Ich daag den ouch hiël de naober  
oët ôm de straot mèt de karnaval prachtig te verseere!

**TEN ACHTSTE:** Juf Nadine en juf Vivi wachtj bij deze ei paar belangriëke take, Ôs klasse  
verseere en ôzze troën dekorere, en leefst zônger van uch oëre te make!

**TEN NEEGENDJE:** Mèt de karnaval gaon wèe same fiëst veere en geneete, daag aan ei stök, Ich  
weit het noë al zeker: het weurdj poëp drök!

**TEN TIËNDJE:** Karnavalsmeziëk is formidabel, den geit eederein oët de bol,  
Es eederein mèt ôs mèt duit, haoje wèe het zeker en vast vol!

**TEN ÈLFDJE:** Ôos leuze veur dit jaor zal zeen:



*Wèe gaon ter neet ôm leege, dit karnavalsezoen hultj neemes ôs tege!*

# *Prins Hendrik 1 & De Rabbedabbers bedanke dees hanjelèers veur hunne steun*

- Danny Kunnen – KD  
Interieurbouw
- ADS+ BVBA
- Bistro Chéz Vie
- Radio Monza
- Aardbeienkwekerij Royakkers A.
- Lemmens Marc BVBA
- Algemene Kitwerken Jacky Neyens
- Press & Paper Clips
- Sportcafé De Schans
- Tattoo Jos Breukers
- Zuidam Classics
- De Bakmiep
- LS Car Service
- Ellen's Hairdesign
- Bandenschap Kinrooi
- BNP Parisbas Kinrooi
- ING Kinrooi
- Linsen Stan Verzekeringen
- Afwerkingsbedrijf Carpentier
- Grond- en Waterwerken Heymans
- Schrijnwerkerij Smeets M.
- Afwerkingsbedrijf Baens
- Haarstudio Suzy
- Lunchbox
- RS Photography
- Bouwwerken Dirk Christis
- Coolen Theo Transport
- Kinesiste Stefanie Joosten
- Schrijnwerkerij Steensels Patrick
- Thuisverpleging Cura
- Vroedvrouwenpraktijk Initia
- Garage Brouns
- Maco Elektro
- VDS Elektronics
- Bosmans & Co - KARO
- Bakkerij Martens
- Traiteur Peter Cremers
- Belfius Kinrooi
- Domen Drinks
- KBC Kinrooi
- BP Interieur Design
- Stals & Co
- Café De Grenshook
- Verzekeringen Teuwen Stefan
- Sec. Poorten Peter Kuypers
- Tuinaanleg en –onderhoud Chris Hendrikx
- Amesco
- Aveve Verbeek
- Fietsen Henkens Eric
- Marc Segers
- Toyota Winters
- Dr. Hechtermans
- Schoonheidssalon Maryeskai
- SMEPO Jan Smeets
- Verzekeringen Schaeckers
- Bloemencreatie Monique
- Café De Limburger
- Security Willen
- Segers Snacks
- Algemene Schrijnwerkerij Jacky Houben
- Dierenartspraktijk de Morée - De Clippeleir
- Kapsalon Brigitte
- Optiek Raquel Staeren
- Chocolade Atelier
- Fietsshop Vandewal
- Garage Vandervecken  
- Sterkendries
- Marisa Di Girolamo
- Petroleumproducten Segers
- 't Stampertje
- Begrafenisonderneming Vancleef
- 't Rond Punt
- Vanwijck Tony Sanitair en CV
- ABC wooninrichting
- Herenkapper Piet Verstraeten
- Melkveebedrijf Linssen - Beckers
- Naaimachines Janssen H.
- Amerikaanse Stock Geelen
- Garage Winters
- Dierenartspraktijk Bruckers
- Frituur 't Hapje
- Keukens Vanthoor Eddy
- Nachtwinkel 't Dorp
- Zakenkantoor R. Theijbers
- Henri Ceyskens Inox
- Tandarts Johan Lemmens
- Kapsalon Marie-Therese
- Kinesiste Ilse Jacobs
- Notaris Debucquoy
- Dr. Bullen
- Frituur GiGi
- Melkveebedrijf Hoeken LV
- Rijschool Het Maasland NV
- Tandarts Vanende M.
- Aardbeien Gebr. Royakkers

*Het is mèt door ugge steun  
det de Kinderse karnaval  
kintj bliëve bestaon!*



# OLS 2018: NOËW AL EI PAK SJADEKLEEJMS!

Het OLS kumtj trök nao Kinders grôndjgebed! Jao, jao, nao Ophove! En aangezeen de Raom op Ophovesse bojem ligtj, mer inne parochie Kinder, moge wèe ouch bèst vriëd en gruëts zeen.

Al van in 't begin van 't veurig jaor hing ter get inne locht in Kinder. Achteraaf gezeen wiste sômmige al hiël vreug det d'n Aoje Limburger zoë good es binne waas. De huërdes het in hiël het dörp: "Ze höbbe hum!" Mer det ging euver ôzze Kloësterstraotterrorist...

Het woor juli en toen gebeurde het: Raom wôn het OLS. De organisasiej begos al drek en het doordje neet lank iër de iëste sjadekleejms binne leepe bij de sjötteriej. Neet miër gemèkelik, zoë ei groët fiëst op puuj zètte in dees zoor tieje.

De iëste kleejm dèe d'n deurwaarder aaf kwaam gèeve, waas van **Marc Elen**. Dèe waas ferm in zenne zak gebete ômdet hèe al de grôndjwirke van de noëwe Aldi al neet maag doen, en ouch veur d'n Aoje Limburger höbbe ze hum euver de kop gezeen. Marc is ter mèt nao Unia gestaptj!

Ei paar daag later stinge diej van Kèsing te rope en te vloke aane sjöttebarak oppe Raom. "Sjaamtj gèe uch neet! Plagiejaat! Boeh!" Toen **Herman Janssen**, dèe het Kèsinger volk van in ziëne divan huërdje kwake, ging kiëke, vloge ze hum bekans rôndj ziëne nak. "Uch Ophover vlag diej gèe höbtj laote



make: det is plagiejaat! Voëlzek det gèe zeetj!"

Ein hiël gedoons waas het.

Gelökkig is det ôngertösse mèt ei tunke beer opgelostj. Diej van Kèsing môtte troewes ouch neet veul zègge. Waat höbbe ziej al neet gepiktj vanzèlève...

De lèste klager, det sloog al hiëlemaol alles. **Dominiek vanne Bôndj** haaj de traone inne ouge toen hèe oppe OLS-steurgroep ziën beklag kwaam doen. "Gèe höbtj mich geruuwieneerdj! Gèe höbtj mich op druëg zaod gezat!" Hèe kuëmdje vanne gift. "Ôm al diej veldje in te zeije höbtj gèe al miën zaod opgekoch, en noë hōb ich al maondje gei zaod miër inne zak. Miën klantje gaon al op ein anger, en bjōs is het ouch ein hiël gespanne sfeertje. Strak geit Brigitte mich nog de luip op..."

En zoë is de organisatie van d'n Aoje Limburger nog veur het fiëst begintj al eine houp geldj kwiët aan misnoegdje dörpsgenoëte. Boë geit det toch hèer! Zörgtj dus mer allemaol det gèe massaal bōnne kouptj inne fiësttent, det het gaat trök vol geraaktj!

## GEWUËN MÔPPE

**Bart Douha** is vandaag pelis te pèerd, en zeet tege **Jutta Meurs** op heure fits: "Van Sinterklaos gekreege?" "Jao," antwoordt Jutta, "sjikke fits hè?" "Jao, mer zèk mer tege Sinterklaos det hèe ter reflektors en leecht opzètj volgendj jaor!" en hèe geuftj heur ei proses van 15 euro.

Jutta kiëktj op nao Bart en zeet: "Sjoën pèerd höbtj gèe, ouch van Sinterklaos gekreegen?" Bart lachtj ins en zeet den: "Jaozeker!"

"Waal," zeet Jutta, "zèk den mer de Sint es gèe hum tegekômmtj det de lul ônger het pèerd huërtj, en neet bovenop!"

Waat is het versjil tösse ei vrouwmes en ein nijlpèerd? Het ein heet ein dikke kōntj en ein groëte moël, en het anger is ei biëst in Afrika!

**Sofie Lantmeeters** en **Vera Hendrixx** zitte op sjoël in het liërarelokaal. Ze zeen aan 't disketere of boëte noëw de zōn of de maon sjientj, en ze kōme ter neet oët. Ze vraoge het aan **Sanne Bral**: "Sanne, is det noëw de zōn of de maon?"

"Ich weit het neet," antwoordt Sanne. "Ich gèef hiej nog neet zoë lank lès..."

Jezus gaaf 5000 man te èete mèt 2 vèsse en ei broëd. Ei mirakel? Nèe... Tapas!



## AANGEBRANDJE MÏPPE



**Miranda Vitali** zitj  
biej Radio  
Monza te  
kaarte en klaagtj:

“Verdomme, noëw heet **Ronny** mich weer eine boekee blome gekoch. Dèe meintj weer det ich den strak mèt de bein ope gaon ligge!”  
“Wiej,” zeet **Jef Doumen**, dèe aan 't buffèt stuit, “höbtj gèe bjuch gein vaas?”

**Rudi Poelmans** en **Marij** kòme bij **dokter Hechtermans**. Marij vreugtj: “Dokter, kintj gèe miène mins ins òngerzeuke? Hèe heet de lèste tièd veul pièn in ziène òngerboèk, hèe heet sj-rik det het òm ein vreiselikke zeekdje geit en dörfdje neet allein te kòme...”

De dokter òngerzeuktj Rudi en nao ei tièdje zeet hèn: “Veur ich dich nao eine spisjalist door gaon steure, zouse mich 3 staölkes môtte bezörge: ein mèt sperma, ein mèt urine en ein mèt stoolgank.”

Marij zeet dao-op tege Rudi: “Den bring ich mörge dièn griès bòks binne, den heet de dokter alles in eine kièr.”



## AAFSJEID VAN MARC SNIEKERS...

Zunj is het. Marc Sniekers geit verhoëze nao Ophove. Wèe gaon het zègge wiej het is: Kinder geit 'r op achteroët en Ophove zal ter op veuroët gaon. Het groëte probleem is ouch det dees gezèt vanaaf volgendj jaor get sjaoler zal wèere. Sniekers waas namelijk altièd good veur ein grap, ein grol of zjust bloodserjeuze kal. Es meerwaardezeukers haaje wèe altièd eine gooje aan Snièk, en det zal vast en zeker ei gemis gaon zien. Wèe vanne Rabbedabber zochte Marc bjum aane koëj op, veur ein lèste intervjoew.

**Rabbedabber:** Daag Marc. Wèe zeen de bananedoëze al klaor staon inne gank. Bèsse klaor òm de stap te zètte nao ein anger dörp?

**Marc:** Bèsse gek. Ich kièk ter aardig tegenop. Inpakke, sleipe, oëtpakke. Niks veur mich. Het innige waat ich gèer oëtpak is òs Annelies.

**Rabbedabber:** Det merke wèe. De höbs òngertösse al 2 kinjer. Gaotj gèe nog veur nummer 3?

**Marc:** Bèsse gek!? Nèenènè, ich wirk allein nog mer in 't klad. En ich wil toch ouch rèeking haoje mèt Annelies. Zoë ein bevalling, det is neet niks! Vroluuw diej al kinjer höbbe zulle het waal weite.

Diej weite vanaaf det momentj presies wiej beroerdj eine mans-kèrel zich veultj esser verkaodj is. Ôs bômme zag altièd: “Veur ein appelvlaaj doon ich het opnoëw,” mer det zeen in dees tièje toch oëtzunjeringe.

**Rabbedabber:** Jao, bjôs oppe redaksiej kinne ter hiël get luj euver mèt kalle. Alles weurdj anders esse klein jung höbs røndj loupe.

**Marc:** Brèek mich de bek neet ope. Eine kammeraod van mich is ouch pas papa gewoore. Hèe zaat lèst wiej eine gebroke mins langs mich aan het buffèt. “Sniekers, jông,” zoë klaagdje hèn, “ich gaon ein van dees ins eine euverval





doon ôm mich te laote vast zette. Get bèeter èete dao en get miër seks.” Gelökkig höb ich het bèeter. Kwestiej van gooj aafspaoke te make.

**Rabbedabber:** De bès waal nog nao de Prinsezitting gekòme, en wèe höbbe ôs laote vertèlle desse dich good höbs gamezeerdj?

**Marc:** Ich amezeer mich altiëd oppe zitting, mer dit jaor waas weer eine ôm in te kadere! Rôndj half 3 nog get gaon èete: eine bikkie, ein boelèt, eine mekziekaano, eine saté en ei bekske saus. De bikkie laag ôngerwèeg nao miëne taksie al oppe grôndj, en dèe mekziekaano haaj ich smörges nog inne maal.

Ich höb hum mich toen mer tösse de boterham gelag.

**Rabbedabber:** Altiëdj sjik desse ter bij bès! En den noë op Ophove aan...

**Marc:** Mèt piën inne pens en in het hart sjrief ich mich #MeToedeloe... Ich kin inne zomer den waal oppe kniëje trök kroëpe van het OLS op heivis aan, mer veur de rest gaon ich ter op achteroët. Sjrief het mer op inne Rabbedabber: oëjts kôm ich trök door ein groëte poort!

**Rabbedabber:** Det hope wèe van harte, Marc! Veul sukses en gelök in Ophove veur Annelies en dich. En spring nog ins binne aaf en toëw, hè!

## GEWUËN MÔPPE

**Tom Prenen** kumtj oppe straot **Jaak Jacobs** tege, en ze haaje d'n eine d'n angere al efkes neer miër gezeen.

Jaak: “Enne Tom, wiej is het nog?”

Tom: “Bwa, het geit waal...”

Jaak: “How, det klinktj toch neet zoë good. Is ter get?”

Tom: “Och, de wèts waal hè Jaak. **Evelien** en ich zitte get in eine sleur, en wèe höbbe neet zoëveul seks miër.”

Jaak: “Ahzoë, dao kin ich neet van mèt sprèeke. Ich doon het mèt **Natalie** hiël veul op ziën Russis de lèsten tiëd... Mer ich zal dich eine tip gèeve wiej ich Natalie in de moëd bring. Zuëse dao bove in diej daakgeut diej 2 veugeljes? Zoë mósse det ouch doon. Ei bitje speule, ei bitje dartelle, heur het hof make en den kumtj alles good.”

Tom: “Es det echt wirktj, wil ich det waal ins probere.”

Ei paar wèeke later kòme Tom en Jaak zich weer tege, en Tom kiëktj nog wèerser es verleeje kiër.

Jaak: “Enne, wiej geit het?”

Tom: “Och jông...”

Jaak: “Toch niks mèt Evelien hè? De höbs toch waal gedaon waat ich dich gezag höb?”

Tom: “Jao jông. Gèef mich anders nog mer ins gooje raod!”

Jaak: “Wiej? Is het neet gelöktj den?”

Tom: “Evelien liktj in 't hospitaal. Ze is vanne daakgeut gevalle.”



# KINDER MEIST HARTVEILIGE DÖRP VAN 'T LANDJ!

Esse eine hartaanval kriëgs, kinse det 't bèst in Kinder aane handj höbbe. Dankziej UNIZO zeen ter her en der defiebrilators gehange, boë desse eine gemakkelik eine elektrisse slaag mèt kins gèeve. De iëste versiej wirkdje gewuën mèt ein gebruëksaanwiëzing, mer det waas neet iedejaal. Inne testfaze – mèt plastieke pöppe diej de gemeindj op internet haaj bestèldj – bleek det 'r nog al get naodeile zaate aan dees aojerwètse pepeere handjleiding. Zoë vertikdje ein aantal minse diej efkes te lèeze, veur ze aan het wirk ginge mèt de apparatuur. **Leon Pouls** ging nog het meist bruut te kiër. Hèe bleef mer roaze en sjòkke gèeve. Toen Leon ziën pöp al begos te smèltje, vònj **Lizette Hornikx**, van het Kinders Roëd Kruus, het good gewèest. “Kôm, Leon, stop dich ter mer mèt! Dich duis mer op, zônger verstandj. Hiël diej pöp nao de botte, allein mer sjaai. Mer good det wèe neet mèt echte luj môtte wirke, of het rook hiej al nao barbekjowvleis.”

Ouch bie **Niels Vaneygen** ging het mis. Dèn uël dach det 'r de 2 pets bèst efkes kos opwerme op ziën eige borstkas, veuralliër ze op ziën pöp te lègge. De kins het al raoje: Niels heet al wèeke aan ei stök piën mèt het gaon pisse, dao löptj hum nog altiëd get zeiver oët de moël en es het dônkel is gèeve ziën ouge presies ei bitje leecht.

Veul te veul sjaai dus bie de opleidinge inne testfaze, boë-door UNIZO besloot òm ter get miër geldj tegenaan te goëje. Vol-ottomatische-

defiebrilatore môste het gaon wèere! Bekskes diej dich zelf zègge waat desse môs doen in tieje van noëd. Al waas de leuze diej de robot gebruëkdje bie versiej 1.0 ouch weer neet iedejaal. “Stuëktj 'r eine inein aan dees kirk of kapel? Pak snel d'n defiebrilator en gèef hum ein lel!” is missjien get teveul veur interpretasiej vatbaar. **Jos Moubax**, nogtans bedieldj mèt ei geveul veur humor, pakedje det get te letterlik en hòwdje z'n oefenpöp mèt eine slaag zoë lek es het mer kos...

**Mathy Kwaspén**, woordveurder van de Kinderse UNIZO-aafdeiling, stuit òs redaksiej te woord. “Inderdaad, nao get op-

merkinge van de luj diej op het terrein operere, höbbe wèe get miër middele vriej gemaaktj òm veur de deurdere versiej te gaon. Minse pakke geine tiëd miër òm röstig ein handjleijing te lèeze, det waas duidelik. Ich merk ouch inne winkel: het lèeze in het algemeen geit ter op achteroët.”

“Toen kwaam nateurlik de vraog: boë hingse diej bekskes het bèst? Dao waas al snel eederein het euver ins. Op plaatse boë gemiddeldj gezeen het meeste aoj peekes kôme nateurlik! Het zou belachelik zeen òm eine defiebrilator te hange in ein kleutersjoël, dèe vervolges noëjts weurdj gebruëkj, òm vervol-







ges op ein plaats boë sinjore van nateure oët dèk same troepe d'n eine nao d'n angere te môtte laote oplaaje. Wèe hóbbe dus de köp same gestoke, en hóbbe ei good plan oët geteikendj. Kirke en kapellekes: doa môs al zeker eine kôme te hange. Biejkômendj veurdeil: det zeen ouch de plaatse diej eederein wètj ligge. Es in diën biejeen eine daal geit, kinse hum of heur teminste snel op dao-aan sleipe. Het zou zunj zeen esse mer get in het wildje wèeg ligs rôndj te sleure, en desse biej wijze van sprèeke de koffietaofel al kins bestèlle esse eindelijk biej ôs greun bekske aan kums. Nèe:

kirke en kapellekes, det is de bèste keus.”

**Jo Brouns**, börgemeister, bekiëktj het langs 2 kenj. “Prachtig det wèe es gemeindj weeral ein vèer op ôzze hood kinne stèek: meist hartveilig dôrp van het landj! Langs d'n angere kantj vrees ich det wèe binne ei paar jaor weer achter de feite aan gaon loupe. Wèe zitte noë al mèt eine vergriëzingsgraod dèe ôs bove de köp oët geit. De nôwbôw van het rösthoës Zorgvliet geit weeral te klein zeen. Boë môtte wèe ze toch bliëve stèeke?!” aldus eine fiere mer ouch bezörgdje Jo.

## GEWUËN MÔPPE

**Maurice Maessen** kumptj **Ronny Tonnaer** tege inne winkel. “Dju, Ronny,” zeet Maurice, “ich zit mèt get en hób dien advies nuëdig,” zuchtj Maurice.

**Sandra** köptj de lèste tiëd veul dèkker noëw kleijer es vreuger. Ze klèdj zich op en löptj d'n hiële daag fluitendj door de koëj op.

Lèst ging heure gsm aaf en toen ich hum heur wou gèeve, reageerdje het hiël giftig: “Det ich mèt miën puëj van heur privé-zake môs aafbliëve en det het mich neet aangeit wèem heur beltj.”

Ouch geit ze eedere dônderdig op stap mèt eemes dèe ich neet kin, en ze leutj zich den aan het begin vanne straot aafzètte zoëdet ich neet kin zeen wèem heur heivis bringtj.

Ôm ter achter te kôme wèem det is, zaat ich lèst verstopptj achter miëne tuf op miën hurke. Toen ich oppe grôndj keek zaag ich get dröppelkes olie ligge.

Noëw is dus de vraog: “Is det normaal veur eine tuf van 2 jaor aod?”

**Bart Christis** vreugtj aan vaajer **Robert**: “Zèk pa, wiej kôm ich het snelste in Gent?” Robert: “Geise mèt de otto, de fits of te voet?” Bart: “Mèt de otto.” Robert: “Det is inderdaad het snelste...”



## WIST GÈE DET...

... 33 jaor geleeje, in 1985, **Jef 1 Eerdekens en Linda 1 Eerdekens** het Prinsepaar van Kinder, en Johan 1 Janssens en Christel 1 Droushoudt het Jeugdprinsepaar woore.

... 22 jaor geleeje, in 1996, **Jos 2 Moubax** de groëte Prins waas, en **Roel 1 Bosmans en Karen 1 Nies** Jeugdprins en Jeugdprinses woore.

... 11 jaor geleeje, in 2007, **Danny 1 Kunnen en Deborah 1 Vanham** es Prinsepaar, en **Maxim 1 Vandewal en Jana 1 Croimans** veurop ginge es Jeugdprinsepaar.

... **Piet Verheyen**, sins jaor en daag ôzze vaste fotograaf oppe Zitting, dit jaor is oëtgerope es Ridder inne Orde vanne Rabbedabbers. Piet stuit ziën vergeujing eeder jaor integraal aaf aan De Kleine Prins, veur kinjer diej tege kanker vechte. Den bèsse ouch in het echte lèeve eine ridder, dunktj ôs!

... **Piet** eine CD mèt foto's vanne Prinsezitting te koup aanbeejdj. Veur slechts 5 euro zeet gèe dao de trotse eigenèer van, en ouch det geldj geit nao De Kleine Prins!

... **Michel Pepels** is oëtgerope tot Kroënridders inne Orde vanne Rabbedabbers. Prachtig waat dèe al gedaon heet veur de Kinderse karnaval!

## PIETER VANHOEF: HET GEHEIM ACHTER HET SUKSES VAN KLUP BRUGGE!

Klup Brugge stuit in ôs vaderlandse voetbalkômpetiesiej los aane kop, en det is weeral de verdeenste van eine rasechte dôrpsgenoët! Hèe zelf haaj het gèer get stil wille haoje, mer det is boëte de redaksiej vanne Rabbedabber gerèekendj. Gèe kintj ôs: nao ei good gesprek en ettelikke pötjes beer ging Pieter akkoord mèt ein eksklusief interjouw.

**Rabbedabber:** Pieter, iëst en veural profesiejat mèt de gooj rezultate van Klup Brugge, boëveur des dich wirks. Vertèl ins: wiej kumtj zoë ein klup bije dich oët.

**Pieter:** Bedanktj. Kiëk: Brugge stuit al jaore veur wirkvoetbal. Blood, zweet en traone. Raoze op het plein. Gaas gèeve. Tempieste. Eigelik allemaol zake diej ich in miëne seevee haaj staon. Ich bèn ouch eine mins dèe zich es het môt ins good in het zweet kintj zètte. Tot het sap mich door de vot löpt. Veur det soort zake haaje ze doa drek simpatie. Ich mog den ouch op gesprek kôme, naodet ich haaj gesolisiteerdj op ein funksie es video-analist.

**Rabbedabber:** En ze koze drek veur dich?

**Pieter:** Eigelik waal. Dao woore 2 zake diej d'n doorslaag gawe: miëne boore-aafkômst en het feit det

wèe bjôs nog mèt eine aojerwètse videorekorder wirke! Eksaktj waat ze zochte.

**Rabbedabber:** En waat duise noë presies dao bije Klup Brugge?

**Pieter:** Dèe zjob es video-analist, dao begôs nateurlik alles mèt, mer ich ging mich al snel mèt miër be-meuje. Dao leepe get zake fout: det wilse neet weite! Ze koze veur eine noëwe trèner oët het Oëstblok en diej luj zeen redelik kaod en druëg in hunne daagdaagelikse ômgang. Ich wis drek: det geit fout loupe in ein booreklup wiej dees. De boorstiel liëktj veur eine boëtestenjer waal hël en groof, mer binnenin is het ei hiël werm gebeure. Mèst dampjtj toch ouch vanne innerlikke wörmdje?! Ich hób den och neet lank getwiëfeldj, en bèn nao bove gegaon, nao het besteur.

**Rabbedabber:** Ôm oppe taofel te kloppe?





**Pieter:** Nèenèe, òm mich aan te beeje es motievator, es hulptrèener zèg mer. Ich trok Antoine Vanhoof zaliger ziène doevemèlkersjas aan, deej de botte aane veuj en lag mèt handj en tandj oèt wiej ich het zaag. En geluif het of neet: ze promoveerdje mich oppe slaag! Mièn ièste wirk waas het opzètte van eine Watsep-groep veur alle speulers. Eederen daag zèt ich dao 20-30 vèttige filmkes op, zoëdet eederein ins kintj lache. Hiej in Limbug is det de normaalste zaak vanne wèereldj, mer dao veele ter van achtereuver. Ouch het gokke op voetbalmatsje trok ich drek nao mich toëw. In plaats van det eedere speuler apaart nao het gokkantoër geit, geuftj eederein eeder wèek 5 euro aan mich, diej ich vervolges door **Peter Hoedemakers** laot inzètte op ei paar wedstrieje. Det is weer ein zörg minder veur diej men. Al môt ich waal toegèeve det 'r sômmige ôngertösse waal ins op beginne speule det wèe nog niks gemaaktj hóbbe...

**Rabbedabber:** De höbs dus veur get sjwung gezörgdj binne de klup. Is det den het groëte geheim?

**Pieter:** Deils, mer d'r is miër. Het echte geheim zitj hum inne introduksiej vanne Yacon. Dao trokke ze ouge van, toen ich mèt ein kroëkèr Yacon op het plein kwaam! Ich hób de mèn wiës gemaaktj det het eine

eksotisse knol is mèt allein mer gooj eigensjappe. De geis sneller loupe, de höbs minder piën, het zaod weurdj bèeter, de huls het langer vol tösse de lakes, de kins langer op stap zônger desse smörges eine kater höbs,... Ich bleef mer oèt miène nak lulle, en ze ginge wiej langer wiej miër door het getuëg! Sins toen beginne wèe op Brugge eeder trèening mèt eine borrel Yep!, de Yacon Gin van **Eric Vanhove** en **Peter Cremers**. **Bianca Iser** is zelfs ins aaf gekòme nao Brugge òm ein preuveriej te haoje. Tiëmbilding môt neet altiëd mèt ein druëg sneej broëd wèere gedaon, zèg ich mer. Ivan Leko, d'n trèener, zuptj 't zelfs al mèt de hiël fles aane moël! Ten slotte hób ich gekoze veur ein aojerwèts plaseeboo: ein zètpil mèt gewuën get zwarte pèeper in. Ich zèg tege de speulers det dao poejer inzitj det oèt de Yacon weurdj getrokke, mer det is neet waor. Ze stèeke zich dus veur eeder matsj zelf de pèeper inne vot, en ze dinke det ze den keihèl kinne gaon op Yacon! Geniaal van mich, al zèg ich het zelf! En: het wirkj want wèe staon los aane kop!

**Rabbedabber:** Det zagte wèe al. Los aane kop! Het môt gezag, Pieter, de duis det good dao in Brugge. Wèe winse dich nog veul sukses, en veurzichtig oppe baan esse weer nao West-Vlaondere aan 't kerre bès.

## GEWUËN MÔPPE

**Werner Verlaek** vanne technische deenst euverlôptj de liëst mèt de aafwezige vanne daag en stèltj vast det **Fons Hendriks** weer neet op het wirk is. Hèe bedinktj zich neet, paktj d'n tillefoon en beltj Fons op òm hum ins good ziën gedacht te zègge.

Fons: "Hallo, mèt Fons." De stum van Fons klinktj vriëd heis.

Werner: "Daag Fons, het is hiej mèt Werner. Det kintj toch neet des dich noëw alweer zeek bès. Het is pas begin miërt en de bès al veur de veerdje kiër zeek dit jaor. Es dich zoë door geis, zulle wèe maotregede môtte pakke.

Fons: "Ich kin ter echt niks aan doon, ich hób haost gein stum miër en ich hób ouch koorts." Werner huërtj det 'r toch waal degelik get is, beslútj òm Fons get gooje raad te gèeve.

Werner: "Loëster, Fons, es ich koorts hób en miën stum klinktj hiël heis, den hób ich mer ein remedie en det is òs **Diane** ins good vastpakke, de kleijer van heur liëf te trèkke en heur den alle heuk vanne kamer laote zeen! Door de adrenalien dèe den vriej kumtj en door het zweite is de koorts ònmiddeliek weg en klinktj miën stum weer normaal. Ich raaj dich aan det ouch te doon, baatj het neet, den sjaadj het neet!"

2 oor later stuit opins Fons kerngezôndj oppe wirkvloer. Hèe zeet tege Werner: "Dju, det waas wirkelik ein gooj remedie, ich veul mich weer zoë gezôndj es eine vès in 't water. En ich môt zègge: gèe hóbjtj ei sjik hoës mèt ein groëte slaopkamer en ei hemels bèd!"

# HET BÈSTE VAN GRENSLANDJ AKTUWHEEL!

Grensländj  
Aktuweel bringt òs  
al eine hiële tiëd  
interessant noets oët  
de regio, en det vinje  
wèe ferm. Zoëwaal  
groët noets es kleine  
aajtemkes kòme  
veurbiej bie de  
luj van Grensländj  
Aktuweel. Tösse  
Keesmis en noëjaor  
brachte ze samen  
mèt presentator **Bert  
Schoofs** hun jaoreu-  
verzicht. Wèe vanne  
Rabbedabber hóbbe  
eederen daag gekeke.  
Toch vinje wèe het  
jaomer detter ei paar  
feite diej Grensländj  
Aktuweel het veur-  
bieje jaor brach,  
neet inzate. Wèe  
gèeve den ouch hiej  
in dit stökske òs  
eige seleksiej: 'Het  
bèste van Grensländj  
Aktuweel 2017'!



# RIËK VAN KAAAT BEGINTJ MÈT SEZOENSARBEID!

Nog efkes, en het dook viltj defienietief veur Café Sport. Rina en Riëk gaon den op kaffeepensjoen, nao mer leefst 41 jaor in het vak te hōbbe gezèete! Mer, Riëk zou Riëk neet zeen esser noë al neet klaor zou zeen òm de vriej kōmendje tiëd nuttig te besteeje.



**Riëk:** Gèe meindj toch neet det wèe vanaaf volgendje zomer nèeve ein oppe divan gaon liggen hange? Det bestuit neet! Ich wèer noë al aaf en toëw gek es ich aan d'n eine en Rina aan d'n angere kantj van het buffèt zitj. Wèe zulle toch op de ein of de anger meneer bezig mōtte blieve, anders geit het garantiej fout. De oplossing haaj ich al snel gevōnje. Ich hōb mich eine multiefunksjonele driejhook nèeve de koej gelag! Van september tot aan het inj van het veurjaor jaag ich ter sjaöp op, diej ich den in juni kin sjèere. Mèt de opbringst van de wol kin ich hiël de zomer terraskes make bieje de kaffees inne naober, en ins aaf en toë eine gèeve es wèe

nao de motorkros gaon. De sjaöp gaon den nao het slachthoës veur het vleis, en mèt dèe winst doon ich mazout in. Inne zomermaondje organiezeerdj Rina den 2 maondj kinjeropvang in d'n driejhook.

**Rabbedabber:** Ouch òm weer mèt de opbringste get te kinne doon?

**Riëk:** Nèe, bèsse gek. Den kin ich op miën gemaak en zōnger gezèeg diej terraskes doon. En Rina is òngetwiefeldj good mèt kinjer. Es ich heur inne café bezig zeen mèt **Ruud Vanaken** of **Jan Smeets** es diej zaat zeen, den wètse det het good kumptj!

## GEWUËN MÔPPE

**Gunther Leenders** en **Kristel Klimkowski** loupe door de Okay. Gunther stoptj mèt het kerke en zèt 'r eine bak Duvel in. "Waat duis dich noëw," zeet Kristel wèers. "Ei kuipke, sjat," antwoordj Gunther. "Met 22 euro want de Duvel stuit in reklam."

"Zèt dèe bak mer snel trök, det kinne wèe òs deze maondj neet permetere," zeet Kristel.

Gunther zètj braaf de bak trök en ze winkele wiejer. In eine angere gank paktj Kristel eine pot gezichtskrèem van 50 euro en zètj 't in het kerke. "Waat dinks dich desse duis?" vreugtj Gunther. "Det is veur de verzörging van miën gezicht, sjat. Dèe krèem geit 'r veur zörge desse mich beeldsjoën zuls vinje." Boë-op Gunther reageertj: "Kôm, zèt det mer trök. Det duit eine bak Duvel ouch en det veur de hëlftj vanne priës!"

**Jo Brouns** en **Jos Vandewal**, sjepe van openbare wirke, staon bieje Jo oppe buro door de vinstert te kiëke nao de tuin van het gemeindjehoës, boë Fons Hendriks en Dirk Bulle bezig zeen. Jos zeet tege Jo: "Diej men diej veur de gemeindj wirke hōbbe toch ei good lèeve hè. Zoë lank es wèe hiej staon te kiëke, en det is toch al dik 2 oor, hōbbe diej kèerels nog geine klop gedaon!"

## WIST GÈE DET...

... **Ronald Zuidam**, vaajer van aod-Jeugdprins Pieter 1, en **Christof Voortmans**, zoon van aod-Prins Marc 3, zeen toëgetreeje tot de Raod van Èllef.

... **Maurice Maesen** en **Ive Kerkhofs** nao ei paar prachtige jaore vol ôngein en lol De Rabbedabbers hōbbe verlaote. Bedanktj veur alles en wèe hope uch nog veul te zeen oppe vastelaovendjaktiviteite.

... **De Rappetappers** dit seizoen al 22 jaor bestaon. Ouch vanwege de redaksiej eine dikke profesiejat veur det prachtig jubileum!

... **Danny J.** ein vanne iēste verdachte waas vanne in-brakeplaog. Bij d'n apetiēk wore Rennis gepiktj en hēe haaj de maal vol.

... Er ein noēw whiskeyzaak is in Kinder. Ze waas ein wèek ope en **Benny vanne Kaap** haaj de klantekaart al vol.

... **Piet Craegs** aod iēzer-verantwoordelikke is van KIVOC. Det wèe det ein hiēl zwaor funksiej vinje.

... **Sjōtteriej St. Servatius** veur det optreeje hun kestuum heet oēt gelliēndj, en det wèe hun dao vriēd veur wille bedanke!

... Det ôzze eige **Marc Meurs** weer ein machtige bijdrage heet geleverdj aan dees gezèt! Dikke mersie!!!

## G-TEAM MAASLANDJ NO PÈEKTJ HUM!

Eederein kintj ze waal: de buure-derbie's inne voetbal. Spanje heet Barcelona – Real Madrid, oppe Hollenjer hōbbe ze Ajax – Feyenoord en bjōs Anderlecht – Brugge. In ôs eige Limburg speule Gink en STVV veural veur de iēr tegenein en in Kinder is ter de klassieko B Reserve – C Reserve. Det de belèving in zoē ein derbie's hiēl groēt is, hove wèe neemes te vertèlle, ôm nog mer te zwiēge euver het respekt veur de tegestrever of de arbieter.

Sins kort is dao eine klepper van ein matsj bij gekōme: De Rabbedabbers tege het G-tiēm van Maaslandj NO! En waat op diej matsj, op zōndig 3 desember gebeurdje, det tartj alle verbeelding. Esse dinks det det sportieve men en vroluuj zeen, den bēsse ter aan veur de meujte! Iērliek is iērliek: diej speulers, diej valle op zich nog waal mèt, mer diej entoeraasj en diej trēners: sjēemel! Wèe ijvere veur de trōkmatsj van volgendj jaor veur eine viedeoref en kōntrol vanne kansspelkommissiej!

De mizeriej begos al toen wèe mèt ôs Rabbedabberploog aankwaame. Wèe woore in ein veul te klein kleidkamer geproptj, boē-in inkel eine gēele bak mèt broēn fleskes sting. Toen de lēste Rabbedabber binne waas, sloote ze de deur gans aaf! Toen wèe nao ein half oor eindelijk boēte mochte, waas dēe bak leeg en de boēke rōndj. Van opwerming of veurbereiding kwaam dus niks miēr in hoēs. Kaod het plein op...

Einmaol inne speulerstunnel kreege wèe drek inne mot det de sjeids neet gehiēl ônpartiejig was. Ôzze kieper voor drek benaderdj door de mins in 't zwart, dēe neet mis te verstaone

instruksies gaaf. Inne achtermaal vanne sjeids staak ter ei rōlke breekkes van 50 euro en toen wèe dao get van zeije, kreeg ter eine hiēle voēle grijns op ziej gezich.

Euver de matsj kinne wèe kort zeen. Van ein verkinningsrunj waas gein spraake. De speulers van het G-tiēm haaje vriej snel door det sōmmige Rabbedabbers ei bitje te vèt stōnge en det 'r angere woore diej neet good wiste det voetbal mèt eine bal gespeuldj weurdj. De meiste van ôs trapdje den ouch snel op hunne iēste, twiēde en dōrdje aojem. Wèe koste den ouch de iēste aanvalsgolve van **Rolf, Bram en Silvie** mèt miēr gelōk den kunde aafweere. Oppe kounter kreege wèe zelfs ein ope doelkans, woor het neet det ôzze veurzitter **Bart Neel** es eine pre-miniem vergaat het lēer aan te rake ôm het vanop eine mèeter afstandj inne gool te sjotte. Nao dees ope kans waas het weer de beurt aan het G-tiēm. **Henrike, Wesley en Jelle** sneeje door ôs verdediging es ei mes door de boter. Det kwaam ômdet **Van Lee** en **Vanasten** stōnge te gaape wiej kuj nao eine trein. Sjēemel. Gelōkkig kos kieper **Danny Jaroszewski** den aanval mèt sukses stoppe. Op het momentj det hēe d'n tegenaanval op gank wiltj bringe, kwaam de sjeids weer aanzētte mèt get flauwe kwatsj. Ein gēel kaart veur het te wiēd oēt de gool kōme en eine vrieje trap veur diej van het G-tiēm! Ôm het nog get erger te make bōnje ze ôzze kieper vast aan ziēn gool! Diej matjs waas verkoch, zoēveul waas duidelik!

Innige leechtpuntj nao de iēste hēlftj: wèe ginge rōste mèt eine 1-1 tōssestandj en de meiste Rabbedabbers koste efkes aane



zuurstoftènk gaon ligge. Natureurlik profieteerde **Raf Nijs** weer vanne zaak òm mèt het bruèdje van eine nao aojem happendje **Sven Beelen** te gaon laope. Toen eine Rabbedabber efkes nao de weesee ging, zaag dèe det G-tièm trènners **Jean en Peter** de sjeids weer get ekstra sente brachte!

Nao de röst òngeviër hetzelfdej spelbeeldj. Al snel kwaame wèe op veursprông vieja **Mark Hoedemakers** (veroët de bèste op het plein), **Raf en Tom**. 1-2. Mer helaas: al ève snel es det wèe op veursprông kwaame, stông het door het getaffel van sòmmige weer gelièk. **Davy, Sven en Christof** òntfutseldje òs de bal en koste vriej gemakkelik skoare. 2-2. Bij **Raf** laag het twiède bruèdje oppe maag, **Bart** wis mèt zièn lang kneuk geine blièf en **Dirk Bogie** verdinke wèe d'r van det dèe ouch òmgekoch waas.

Nao de 3-2 en de 3-3 waas het hiël duidelik: de 3 puntje zouwe neet veur òs zeen. Eeder poging oppe gool van **Sandro**, stopdje hèe mèt gevaor veur eige lèeve. Dèe kèrel stông zeker en vast stièf vanne doping! Esse den ouch nog ins ein belachelikke gool tege kriègs en de sjeids flötj dik 5 minuute te vreug aaf, den wètse het waal...

Eindstandj Rabbedabbers – G-tièm: 3-4. Sjèemel!

Volgendj jaor staon wèe ter trök! In de tössentièd is **Sven** aan 't diejeete geslage wiej eine gek, **Danny** duit niks mièr es vèsse òm zich zeker neet te blesseere, **Bart** geit op voetbalkamp, **Tom en Stijn** probere zich neet te fel te begaaje bij de Reserve van Maaslandj, **Bèr Eerdbièr** buktj zich neet mièr òm de rök te spaare en **Dirk** weurdj getransfereerdj!

## AANGEBRANDJE MÔPPE



**Wout Hoeken**

vertèltj: “Lètst ging ich nao **dokter Bullen**,

en dèe zag mich det ich mós stoppe mèt masturbere. Ich antwoordje hum: boveur zou ich? Ich vinj det fijn. Toen zag mich dokter Bullen: “Man! Ich probeer dich te òngerzeuke!!!”

**Kyrann Caris** zitj bij **juffrouw Nadine** inne klas. De juf is bezig mèt ein lès seksuele opveujing. Ze teikentj ein borst op het bord en vreugtj aan de klas waat det is. Kyrann stiktj zièn vingerke op en zeet: “Det is ein borst en mièn mama heet ‘r zoè 2!” “Hiël good, Kyrann,” zeet juffrouw Nadine. Den teikentj ze eine piemel op het bord.

Weer stiktj Kyrann eine vinger op en zeet: “Det is eine piemel... en miène papa heet ‘r zoè ouch 2!” Juffrouw Nadine kièktj ins raar en zeet: “Waat zèks dich noèw?”

“Waal jao, eine van 5 cm òm mèt te pisse en eine van 20 cm òm mama heur tenj mèt te poetse!”



# GEWUËN MÔPPE

**Marc Voortmans** en **Lut Schouteden** woore neet lank geleeye 25 jaor getrouwdj. “Lut,” vroeg Marc op eine aovendj in bèd, “bès dich oëjts vreemdj gegaon?” “Och Marc, boëveur vreugse mich det?” antwoordj Lut. “Ich wil het gewuën weite,” zeet Marc. “Ok den, 3 kiër...” “3?! Wienië waas det???” “Waal, Marc, herinnerse dich dèen tiëd toen desse 35 jaor woors, en gèer dien eige betôngzaak wous beginne, en gein inkel bank dich ein liëning wou gèeve? Wètse nog det op eine daag de direktieur vanne Fortis langs kwaam en de pepeere vanne liëning ôngerteikendj woore zônger get te vraoge?” “Och Lut! Hôbs dich det veur mich gedaon,” lachtj Marc. “Ich hób noëw zelfs nog miër respekt veur dich! En waat waas de twiëdje kiër?” Lut: “Wètse nog desse eine hartaanval hōbs gehadj en desse ein zwaor operasiej nuëdig haajs boë geine inkele sjirurg aan wou beginne? Herinnerse dich nog det opins ein vanne bèste dokters oët Brussel hiej sting op dich te operere?” Marc: “Mer Lut toch! Ich kin het neet geluive! Des dich det veur mich hōbs gedaon ôm miën lève te redde! Ich zou mich gein bèeter vrouw kinne winse. En waat waas den dèen dōrdje kiër?” Lut: “Wètse nog desse delegee vanne vakbōndj wous wèere en desse 45 stumme te kort kwaams?”

# FLITSE VAN O





# OPPE PRINSEZITTING!



## GEWUËN MÔPPE

Vreuger zate **Tony van Tony's Meubeltje** en **Hubert Brouns** biejein in het leger.

Op ein vanne maneuvres môste ze same ein ei tentje slaope. Midde inne nacht maaddje Tony wakker en hêe vreugjt hum: "Tony, boë aan dinks dich esse zoë eine heldere hemel zuës mèt fônkelendje sterre en bekans ein volle maon?"


Boë-op Tony zag: "Ich dink aan de ôneindigheid van het heelal, de ôngriëpbaarheid vanne sterre, en zelfs aan de astronoute diej oëjts eine voot oppe maon hōbbe gezat."

Hubert antwoordj:

"Onnuëzelèer! Ich dink inne iëste plaats aan ôs tent diej is weg geweijsd!"

**Prins Hendrik** en ziën **Prinses Kim** zeen op hotel. Hendrik beltj in volle gift nao de resepsiej. "Kôm ônmiddelk nao ôs kamer! Ich hōb ein zwaor diskuusiej mèt miën vrouw en ze wiltj oët de vinster springe!"

Het antwoordj vanne resepsiej: "Sorry meniër, det is ei relasiejprobleem en dao kinne wèe neet tösse kōme. Boë-op Hendrik: "Jao, mer ziej kriëgtj het vinster neet ope, en det is duidelik ein ôngerhaodsprobleem!"



## FÔMFAREZAAL 2.0 INNE STEIGERS: WÈE KEEKE ALVAST DE PLANNE IN!



Het heet efkes get langer gedoordj, mer de aoj sporthal aan Nelisveldj is allewiel aane binnekantj eine groëte werf. Het besteur vanne fômfaar heet het leecht op greun gezat veur de verbōwinge. Volges de offiesjeel versiej vanne feite heet het zoë lank aangesleiptj ômdet iëst het galakonsert en de Prinsezitting achter de rōk môste zeen. De daadwirkelikke reeje is echter hiël get anders.

Het gemeindjebesteur waas al efkes gerōstj det de zwaor ôngerhanjlinge achter de rōk woore, en det **Thieu Nijs** en **Marc Elen** elk ein splintjernōw koëj en ein vakansiejhut op Center Parcs oët de brandj haaje gesleiptj. Alles good geregeldj zouse dinke. Mer det waas boëte de profesjoneel ôngerhanjeliërs vanne fômfaar gerèekendj! Multienesjonals en Duitsers of neet: het ôngerste môs oët de kan. "De fômfaar heet 't zoë al neet breid, dus wèe hele ôs puëj stiëf ôm eine zaal te kriëge dèe speulklar én zoëpklaor is. Angers kriëge wèe weer ei wurgkōntraktj

van d'n eine of d'n angere brouwer op ôs pens gedōwdj," aldus eine strijdvaardige **Marc van Hover**.

Zoë gezag, zoë gedaon, en terwiël Thieu Nijs en Marc Elen de bananedoëze al stillekes aan 't vol dōwe woore en sjepe **Jos Vandewal** mèt de planne veur de nôwbōw vanne technisse deenst aan 't zeuke waas nao eine goojekaope aannummer, kabbeldje de winter veurbiej. "Veur det wèe het wiste waas het zomer," zeet Hover. "Diej men van Aldi mèt hun sjikke kestuuums begoste miër en miër te zweite, en **Pierre** en ich



# VERANGERINGE OP TIL INNE KINDERSE STRAOTNAME!

 Binnewèeg

 Boëtewèeg

 Broekstraot

 Bôksewèeg

 Kloësterstraot

 Begiënewèeg

 Brandjstraot

 Blusstraot

 Hagendorenstraot

 Chinatown

 Natterveldj

 Druëgerwei

 Mèlkeriejstraot

 Bowlingbal Avenue

 Processiejwèeg

 Zôndigveurmiddigwanjeling

Mèt weer eine nôwe fusiejrunj dèe nakendje is, is het gemeindjebesteur van Kinder alvast begôs ein aantal straotname kritisch tege het leecht te haoje. “Wèe zitte namelijk mèt hiël get straotname diej ouch in de gemeindje en steeje in ôzze naober gebruektj wèere,” leutj plaatselikke naamgèvinggoeroe **Hubert Van Eygen** weite aan ôs redaksiej.

“Es wèe strak verplicht de klôm-melle biejein môtte goëje mèt Bree, Mezeik of – ich haoj miën hart al vast – d’n hiële Maaskantj tot Laonekke, trèktj Kinder toch aan het kortste intje. Den moogse de meiste zônnepeniële hóbbe ligge of de meist vèsvriendelikke gemeindj zeen, dao kreijjt den geine haan hèer. Wèe hóbbe den ouch eine wirkgroep opgerichtj ôm al ein aantal alternatieve te verzinne veur straotname boë wèe zoëwiezoë mèt inne probleme gaon kôme.

Es primeur gèeve wèe uch biejein deze al inzage in ei paar verangeringe diej al zoë good es rôndj zeen. Môste ter luj zeen diej zègge: “Ich weit ouch nog eine gooje,” den kinne ze kôntakj oppakke mèt mich. Alle hulp is welkôm ôm diej van Mezeik en Bree veur te zeen.

kwaame inne korte bôks nao de ôngerhanjelingstaofel.”

“Sjrief het uch nog mer eine kiër op uch pepeere: s-p-e-u-l-k-l-a-o-r en z-o-ë-p-k-l-a-o-r! Angers geie zaal, geine Aldi, gein euvereinkômst” Wèe zate alweer bekans op ôzze fits heivis, toen ze ôs trök reepe: “Verdammt nochmahl, Sie sind lustige, unnachgiebigge steife Köpfe.”

De buit waas mèt anger weurd binne!

Marc besluitj: “Naoderhandj hóbbe wèe alles good op pepeer laote zètte. Aldi duit in feite alles kwa inrichting wiej wèe det gèer hóbbe, en es tegeprestatiej zulle wèe inne nôwe fômfarezaal het beer van hun hoësmerk tappe. Zèg het zelf: toch gooj waar veur eine kleine kostpriës?!”



# FLITSE VAN OPPE KINJERZITTING!





## HET GANSE JAOR TIROL BIEJ LINSEBOOR!

Sins **Jan Linssen** hiël get van ziën aandeile heet verkoch, is hèn ei pak röstiger gewoore. Geine stres miër, en veul miër tiëd òm mèt **Reinhilde** ins te gaon winkele of ei wiëkendje weg te gaon. Zoë is 'r veurig jaor ins nao het Oktoëberfiëst in München gewèest.

“Waat ich dao hób gezeen: fantastis!” aldus eine herbore Jan. “Det Oktoëberfiëst dao, det is ei spektakel, det zèg ich dich. Groëte pöt beer, de vroluuj de sjarkuuteriej half bloët en eine formidabele ambiejaos. Wèe hóbbe òs dao driëj daar good laote gaon, Reinhilde en ich. Toen ich trök bjôs kwaam, hób

ich drek de rest vanne men hiej same gerope. Ich haaj ei geniejaal gedach!”

“Es wèe ins hiej oppe boorderiej ei Zuëvelfest organizeere? Zoë ein Oktoëberfiëst det doon ze inne naober al genôg, det is niks noëts. Gei beer en braodwooste dus, mer liters mèlk en bruëdjies joghurt en platte kiës mèt bieslook! Eederein waas drek boëswildj, en ich hób mich door de Boumkamer ein Tirollerhut laote plaatse. Dao kinsè altiëd terecht veur eine halve liter veese mèlk en get te knauwelle. Het lèste wiekendj van september organizeere wèe den òs Zuëvelfest,

mèt ein fiësttent en optreejes van get Duitstalige groepkes diej ich laot boeke door **Tei Quix**. Tei heet gooj kôntakte in dèe wèereldj en kintj miër van meziëk den **Thomas** of **Kurt**. Diej hóbbe inne traktaör alzelève Boef opstaon, en dèe môt ich neet.”

**Rabbedabber:** Es karnavaliste haoje wèe van fiëste en wèe juiche den ouch eeder ienesjatief toëw! Wèe winse Jan veul sukses mèt Zuëvelfesten rèekene ter op det wèe gratis binne moge es wèe in kestuum kôme!



## WIST GÈE DET...

... **De Raod van Èllef** zoë-es eeder jaor de Prinsezitting heet geopentj. Dit jaor blikdje ze trök op de lêste kavelrunje op het OLS in Merkelbeek, boë St. Servatius Raam mèt d'n Um heivis mocht gaon. Ze stèldje inne gang het ônonfiesjeel OLS-leadje veur!

... Er oppe Prinsezitting ouch weer sjikke optreejes woore van **The All Stars, de Dames vanne Raod van Èllef mèt het Aod-Jeugdprinsepaar Pieter en Niene, de Aod-Prinse, de Aod-Prinsesse en de Sjaaimakers.**

... Det **MarC 3** ziën eige Prinsezitting heet aafgeslote mèt ein knallendj leadje op Thunderstruck van AC/DC.

... En det **Vorst Mark** Angus Young speuldje. Det waas de innige vanne Raod dèe in det pekske pasdje!

... **Pascal Gabriëls** gratis leechtreklaam heet gekreege aan het veurmalig tènkestasjon vanne Keij.

... Wèe **Dries Terium** weer van harte wille bedanke veur ziën technisse ôngersteuning bij het make van ei paar nummerkes veur de Prinsezitting. De bès geweldig!

... Det wèe vanne Rabbedabber op zeuk zeen nao redaksiejlede diej gèer mèt wille wirke aane volgendje edisies van dees kwaliteitsgezèt. Meejle nao [rabbedabbers@hotmail.be](mailto:rabbedabbers@hotmail.be) en den kumpjtj alles good!

# ROB WIRIX KALLEFATERTJ ZIÈNE GEVEL OP WÈE WOORE TER BIEJ!



Rob Wirix van op 't Dörp heet neet stil gezèete aafgeloupe jaor. Heè heet ziene veurgevel opnôw inne vèrf gezat. Wèe vanne Rabbedabber woore ter bij, en volgde de wirke oppe voet op. Rob is neet euver ein nacht iès gegaon, en heet zenne tièd gepaktj. Haost en spoed, det is zeldje good en kwaliteit primeertj op kwantiteit. En jage, det duise mer in 't bos.

Ôngertösse zeen de werkzaamhede aane veurgevel aafgerundj, en stuit de stèlling al opgestèldj nève de ziejgevel. Ouch in 2018 geit de gevelrenovasiej wiejer. Wèe winse Rob alvast veul sukses, weinig rèegenwèer, veul zôn mer ouch weer neet te werm. Den kumtj ouch de ziejkantj vanne koej weer snel in orde!



## #METOO IN KINDER!

Waat ei gedoons toch allewel. De kins neet miër nao ei ferm mèegdje, ein MILF of ein GILF kièke, of de weurs besjöldigdj van grenseuversrijdend gedraag. Laot staon fluite of ei hendje euver de kniëj laote gaon. Den is het kot al hiëlemaol te klein! Gelökkig duit Kinder neet mèt aan diej hetze. Wèe bliëve ter mèt z'n alle vriej röstig ônger.

“In Kinder zeen wèe al hiël get gewuën waat betreftj grenseuversrijdendj gedraag,” wètj sjepe van verkiër **Ivo Vleeshouwers** ôs te vertèlle. “Vanoët Kinder weurdj 'r al lank massaal de grens euver gegaon nao de Jumbo ôm te gaon winkele. Det kinne wèe perfekt zeen mèt ôs slum kamera's oppe grenseuvergence.”

“Diej hesjte MeToo gevalle, dao höb ich bjôs in 't Dörp geine weit van. Gelökkig mer. Dao zeen waal get anger hesjtekskes diej allewel mèt regelmaot veur valle:

### #MeToëw

**Jos vanne Keij** dèe de zaak toëw duit...

### #MeToedeloe

**Marc Sniekers en Lies** diej wèg trèkke oët Kinder...

### #MeTattoo

Kompliët eederin dèe boëte kumtj bij **Jos Tattoo**...

### #MePottoëw

**Jaak Jacobs** dèe zich haaj euvreète bij Chez Vie...

Gein reeje tot paniek mèt anger weurd. De luj oët Kinder laote dees raasj röstig euver weije!”

## GEWUËN MÔPPE

**Bèr vanne Meule** heet goesting in eine krèem. Hèe zeet tege zièn vrouw det 'r effe nao **Ronny Segers** van het Ijsboerke löptj. “Oh! Pak mich ouch eine mèt,” zeet **Toke**. “Eine bol vaniel en eine bol sjokkolaat. En sjrief dich det op, ich weit wiej det geit. Strak vergètse het!” Ei keteerke later kumtj Bèr trök bjun. Hèe heet zich eine frit stoofvleis mèt en veur Toke eine frit majonèes en ein frikedel. Toke zuët det en begintj: “Jông, jông, jông! Ich zag nog sjrief het op. Ich höb dich nog zoë gezag det ich geine majonèes oppe fritte wil!”

**Raf Terwingen** tege **Prins Hendrik**: “Enne Prins, lempke oët?”

Prins Hendrik: “Jao, ich bèn stikkapot!”

Raf: “Ich bedoel het lempke vanne fritketel...”



# GEWUËN MÔPPE

## Mat Denier en Steef Gielen

wirke bij de technisse deenst. Op eine gooje daag môtte ze oppe Raom mèt de sjoop get gate gaon grave veur de vlaggemaste oppe Aoje Limburger. Geluif het of neet, mer al bij het make van het iëste gaat, stoëte ze op 2 bômme oët de iëste wêreldjoorlog! Mat en Steef euverlêgge waat ze gaon doen.

Mat: "We belle nao DOVO, dijk kômme dijk bômme den hole."

Steef: "Bësse gek! Het is al 2 oor smiddes. Es wêe dao op môtte wachte den kômme wêe veul te laat trök inne wirkhal."

Mat: "Waat stêls dich den veur? Wêe kinne dijk bômme hiej toch neet laote ligge?"

Steef: "Wêe lêgge ze achter inne bak vanne kammejao ônger ei zeil, pakke ze mörgevreug trök mèt, belle den nao DOVO en zêgge det wêe ze pas hóbbe gevônje."

Mat: "De bès gek jông! Es wêe dao mèt rônjd gaon rieje, den kintj 'r toch gemakkelik ein ôntploffje! En waat den?"

Steef: "Det is toch simpel, Mat. Den zêgge wêe gewuën det wêe ter mer ein gevônje hóbbe."





# Basdônkion FESTIVAL

## STEEF VANNE BASDÔNK ORGANIEZEERTJ BASDÔNKIONFESTIVAL!

Ei paar jaor geleeje haaje wèe hiej in Kinder veur d'n iëste kiër het Tomorrow Twan Festival, ôntstange oët het veul kleinere Tuinfest en drek eine knaller van formaot. Toch bleef het nao de iëste edisiej stil. Zou Twan gein goesting miër hōbbe g'hadj? Sjrik òm neet bèeter miër te kinne? Gei mins dèe hetj wètj.

Mer: dao is good noëts! Neemes minder es Steef vanne Basdônk zètj ziën breij sjouwers ônger ei spiksplinternoëw Kinders meziekfestival! Wèe gin-ge langs oppe boorderiek van Steef veur ei kort intervjoew.

**Rabbedabber:** Daag Steef. Wiej kumse ter bieje òm zoëget es het Basdônkionfestival op puuj te zètte?

**Steef:** Met het nao de kloëte gaon van Tuinfest en het besjeije sukses van het fiëstje waat òs jōnges organiezere mèt de Runje van Vlaondere, kreeg ich het op eine nacht in òm ouch ins get op puuj te zètte. Ich dach: "Steef, noë geit het nog!"

**Rabbedabber:** Bitje eine midlaajf-krisis dèe opspeultj?

**Steef:** Bèsse gek. Dèe ligtj al efkes achter mich. Ich huërdje mer kontienuu gezeiver euver det fiëst op 't Bastion in Kèsing en vōnj det ze dao toch aan 't euverdriëve woore.

**Rabbedabber:** Bitje zjeloës?

**Steef:** Bèsse gek! Niks zjeloës! Mer het is toch erg: Kèsing hiej, Kèsing dao, Kèsing eueveral.

**Rabbedabber:** Toch ei bitje zjeloës dus?

**Steef:** Ei bitje missjien. Plus: ich wil de jōnger gèer ei plezeer doon òm de Runje van Vlaondere langs hiej te laote rieje. Det ze ouch ins het geveul kriëge òm ein echte VIP-tent te hōbbe staon.

**Rabbedabber:** De Runje langs Kinder? Geise det waal klaor kriegje?

**Steef:** Zeker det! Is Kinder gei Vlaondere missjien? Ligge wèe



oppe Hollenjer of waat? Ich gaon ferm op miën strepe staon!

**Rabbedabber:** En wèem hōbse es artieste geboektj?

**Steef:** Ich hōb neet op eine frang ge-keke, gèe kintj mich. Rōnd de mid-dig begintj Freddy Birset, en daonao stuit Stan van Samang oppe bühn. D'n dōrdje artiest is Nathaniel Ratecliff en tege d'n aovendj zaktj ouch Rowwen Hèze aaf nao de Basdônk. Es het dōnkèl begintj te wèere zètj Helene Fischer de wei in veur en vlam en aafsloëte doon ichzelf: DJ Steef vanne Basdônk!

**Rabbedabber:** Gooj keus, Steef! Wèe kōme zeker aaf!!!

## GEWUËN MÔPPE

**Jurgen Caris** stoptj ei paar maondj geleeje mèt ziëne koersfits aan het tènksstasjon vanne Keij, toen dèe nog ope waas. Jos kumtj nao boëte, want hèn vindj het mer vreemdj.

Jurgen zeet tege Jos: "Goej hum mer vol!" Jos speultj het spelleke mèt en begintj: "Ping! Ping! Ping!"

Jurgen: "De moogs ouch ins get olie biejevölle en de drök van miën benj kontrolere." Jos blijftj mèt speule. Efkes later wiltj Jurgen vertrèkke, en drek kriëgtj hèn van Jos ein ferm lel tege ziën oëre. "Veurwaat duise det noëw?" zeet Jurgen.

Jos: "Diën deur sting nog ope!"

In ei ver verleeje waas vitrenèer **Theo Bruckers** eine zjokkie, gèe wètj waal: zoë eemes dèe mèt duit aan renwedstriëje mèt pèerd. Meistel reej Theo mèt ei pèerd van eine renstal. Theo bakdje ter echter neet veul van, hèn kwaam altiëd es lèste aan. Op eine goojen daag woor het teveul veur de renstaleigenèer, en hèn besloot òm Theo ins flink de leviëte te lèeze. De konversasiej ging òngerviër es volgtj: "Theo, dich bès iëwig en altiëd lèste. Kins dich echt neet sneller?" Boë-op Theo zei: "Ich kin waal sneller, mer volges het reglementj môt ich bij het pèerd bliëve!"

# 100 JAOR BÔNDJ!



Bôndj bestuit 100 jaor: fiëst! Nèenèe, neet **Dominiek** nateurluk, en ouch Henri en Mia zeen lank gein 100. Neet det wèe **Henri en Mia** det neet gunne, verre van. Mer zeet iërluk: det zou ei klein wônjer zeen. Diej minse hōbbe aardig get aafgezeen toen ze Dominiek kreege! Nèe, het is de zaak diej 100 jaor bestuit, en 't is alzelève binne de familie Verbeek gebleve. Eine mijlpaol in Kinder! Alweer!

Veurig veurjaor veerdje de Bôndj ei gans wiekendj fiëst. Dao waas eine fotohook boë desse in dien bloëte vot op ei sjaopevel foto's kos laote trèkke, dao waas èete en drank veurzeen, de kos veur bojempriëze kniën en ploemvee mèt pakke, Dominiek zelf leep inne Boorebôndjkleijerdracht van vreuger en ouch **Lange Né** leep es klooj rōndj. Dominiek haaj spisjaal veur klooj Né ei paar klein kloojefitskes en eine groëte balanseerbal klaor gelag, mer det ging flink mis. Al bij het iëste fitske sjoot 'r get in Né ziëne rök en einmaol mèt eine voot oppe bal, ging 'r mèt z'n snoët tege de grōndj. De rest vanne daag heet Né get bij de kuëkes gezèete en heet hèn zich good vol gesjōdj. Van mezeriej heet Dominiek den mer nao **Sofie** gebeldj òm vaajer Né te vervange,

waat ze veurtreffelik heet gedaon!

Pierre en later Henri maakdje in vreuger jaore gebuëk vanne tramtösse Mezeik en Wiërt veur de levering van waar. De mèst enne kole kwaame vieja Mezeik. Det kinne wèe waat dèe mèst betrefjt good begriëpe...

In dees modern tiëje geit het 'r veul rōstiger aan toëw. In feite lèeftj Dominiek wiej eine god in Frankriëk, en det zōrgtj bij de buure vanne Legerstock toch veur get vrijel.

**Rob** stuit zjust langs het groët plakaat van Bôndj, boë detter mèt stoëftj euver het 100-jaorig bestaon, es òs redaksiej langs kumt. "Pfff, get stoëfe òmdet volges de kalender het zjust 100 jaor geleeje is det ze zeen begōs," klaagtj Rob. "Op het gemaak aan de jaore optèlle, det is zoë meujlik neet. Wèe zeen mèt òzze Legerstock begōs in 2001. 17 jaor geleeje dus. Mer ich hōb gister mèt **Anja en Anneke** ins zitte tèlle.



# NACHTWINKEL KINDER BREIDJ OËT!

Groët noets: de Kinderse nachtwinkel in 't Dörp geit verhoëze. Nao d'n euverkantj vanne straot boë vreuger Sillen zaat mèt ziën bekkeriej. Wèe ginge op ôngerzeuk oët en waat bliëktj: de nachtwinkelbisnes dreijt op volle toere! Dao kinse ferm good diene boterham mèt verdeene. Wèe ginge ins ginge polse bij **Singh** euver het wiej en waat, en kwaame hiël get te weite.



**Rabbedabber:** “Ei Singh, kame-raod, profesiejat mèt de noëw zaak! Allé, es ze strak klaor is nateurlik.”

**Singh:** “Danke. Ich hoop het snel te kinne beginne. Verhoëze zal neet te meujlik zeen, het is mer den euverkantj vanne straot en ich kin euverdaag verhoëze. Den is het nateurlik waal sterves drök oppe baan. Mer ich hoop det de naober mich efkes kumtj helpe, den is det op 1-2-3 gepieptj.”

Wèe wirke altiëd veur 3, wauve ouch op zôndig door, pakke praktis gei verlof... In feite kôme wèe in diej 17 jaor gaas gèeve ôngerèkëndj ouch aan 100 jaor geleverd-

**Rabbedabber:** “En wiej kumse ter bij ôm ôm te hoëze mèt de bazaar?”

**Singh:** “Plaatsgebrek. Ich wil miër diepvriezers kinne zètte ôm zoë miën assortiement diepvriespieza's en sneks oët te breije. En de zuës het: de parkeerplaatse veur de zaak wèere op eine slaag verdöbbeltj! Ein ekstra troef ôm 'dich' tege te zègge! Ich höb ouch al eine noëwe naam veur miëne nachtwinkel 2.0...”

je arbeid. Mer zuëse of huërse ôs dao euver stoefe?!”

Wèe vanne Rabbedabber höbbe de boel get probere te susse, mer Rob bleef toch staon bôkke toen wèe heivis ginge. Alleszins eine dikke profesiejat aane Bôndj en bedanktj veur de geweldige ôntvangst. En es het oëts zoë wiëd is det de Legerstock aan het fiëste geit, den gaon wèe dao ouch mèt èveveul goesting op aan! Sjol!



**Rabbedabber:** “En det is? Kriëge wèe de priemur?”

**Singh:** “De Voedingssirkel! Gèe môjt weite: de nachtwinkelsektor heet het zoë al zwaor. Sins het aafsjaffe vanne rooming is de verkoup van tillefoonkaarte gans inein gezaktj. De bels tegewoordig veul goojekouper nao het boëtelandj en det veul ich in miën portefuij. Ôm nog mer te zwiëge van dèe noëwe voedingsdriehook boë ze weer mèt aaf kwame. De moogs tegewoordig niks miër in diene môndj stoppe, of dao stuit eemes mèt het vingerke te zwiëje. Det is neet gezôndj, neet te veul, laot det ligge, dink aan de kollersterol, slecht veur de tenj, slecht veur de derm, de weurs te vèt,... Det soort gemiëm. Dao kumtj den nog ins bij det ze kômpliët hiël het assortiement waat ich hiej höb ligge in eine sirkel apaart höbbe gedoëwdj. Ein regelrechte sjanj! Ich höb al nao UNIA gebeldj mer diej zeen bliëkbaar euverbevroagdj allewiel. Ich dach in miën eige: #IchNeet! en ich bèn gaon breenjstorme. En awaal, ich bèn ôngertösse verdomme trots op het feit det ich inne sirkel zit en neet bij det kniënsvoor in d'n driehook! Ich presenteer uch den ouch gèer miën eige interpretasiej van det zjevaakel en ich weit het waal hiël zeker: eine diepvriespieza, ein portie bitterbèl of eine zak sjips, dao môjt gèe veur inne sirkel zeen!”



# WATSEP BUURTNETWIRKE IN KINDER!



Het is uch ôngewiefeldj het aafgeloupe jaor opgevalle: zoëget eeder wiëk of straot in Kinder heet ein eige Watsep buurtnetwirk. De bedoeling van dees digitaal groepkes is det de luj ôngerein kinne melde es ter get neet inne haok is inne naober. Stuit er eine vreemdje otto örges op ein raar plaats: meld het inne Watsep groep. Is ter eine ielegaal aan 't stoke bjun achter: klaag het aan inne Watsep p groep. Trêkke diej van Jehova rôndj: verwittig de rest vanne naober det ze veural de veurdeur neet ope doen. Echt ein henjig dink, mer toch löptj het neet altiëd wiej het zou môtte.

**Piër Grispén** lègtj behuërlík get drök op het netwirk van 't Dörp. Hèe meindj het good, mer toch is het vervèelendj ôm kônstantj te bèedele veur eine taksi nao Mezeik. Dao deentj het buurt-

netwirk echt neet veur!

Biej sômmige zörgtj wirkelik eeder berichtje veur eine houp stres. Dao môt nog mer eine get poste euver eine verdachte otto oppe Brookhook, of **Marijke van Tony Vanwijck** stuit al boëte veur de deur mèt ein deigrol te zweije. Zelfs in heure pinwaar! Ouch **Thea van Jo Kwaspén** stuit drek te dreige mèt ein pan. Dao dinke ze waal 2

kiër nao ôm te gaon inbrêeke.

**Marc Vrolix** meintj den weer d'n hiëlen tiëd det 'r in ziëne groep ein poetsvrouw kintj bestèlle. Es eemes dao kommentaar op geuftj, begintj Marc te zwanze euver 'net-wirk' en de beteikenis daovan.

Eemes dèe ter bekans aan ônger door geit is **Jos Moubax**. "Ich wèer d'n hiële tiëd geviëseerdj," klaagtj Jos. "Ich môt nog mer trök kôme van het wirk, of dao weurdj weer ein melding gemaaktj det 'r eine vèttige Roemeen door de straot op geit. Miën zelfbeeldj is zoë good es ôm zeip."

Ten slotte hóbse weer luj diej allein mer sjèele zeiver en naakse vroluuj poste. Dao hóbse dus niks aan. Inne Sjans-ep hóbbe ze **Tom Prenen** al flink de wacht aangezot en oppe Noordhook is het veur **Dirk Beijsberger** al de lèste kans. Angers vleege ze ônherroepelik oët de groep.

Wèe vanne Rabbedabber dinke waal degelik det 'r toekômstj zitj in ein good dreijendj Watsep buurtnetwirk. Waat waal van groët belang is: goodj aafsprouke, boë eederein zich aan hiltj!



# GORDON GEIT TROUWE MÈT EINE OËT KINDER!

De bekindje Hollandse zanger Gordon is op vrijeversveuj, en dao weurdj ei gans tillevisiesjprogramma van gemaaktj. Gordon wiltj vanne straot aaf, en trouwe mèt eine ònbekindje, gewuëne mins. Hiël get luj sjreve zich in veur de seleksiej en mèt eine kamera in hunne nak kos het ketse, sjanse en opgeile beginne. Jaomer genôg leeverdje de hiël sirk niks op, en kwaam ter den toch geine trouw van. Mer òngertösse haaj Gordon waal Kinder liëre kinne, want hëe waas ouch hiej op 't Dörp kômë vriëje. De Kinderse luj môtte eine gooje indrök op hum hëbbe achter gelaote, want hëe plentj alweer ein noëwe serie: 'Gordon geit trouwe 2 – Kinder, Belsj'. Allein luj oët

Kinder moge zich insjrieve, en det gebeurdje ouch massaal. Wëe vanne Rabbedabber kreege de primeur òm al ei paar name ònger ouge te kriege. Het môt gezag: dao zeen verrassendje kandidate bij!

**Diego en Roland van Chez Vie** hëbbe ruzie òngerein. "Ich kook het bèste!" "Nëe ich kook bèeter!!" zoë gaon ze al daag tekiër tegenein. Wëe zulle zeen waat Gordon d'r van vindj. De leefdje vanne man geit door de maag, det is get det zeker is.

**Steve Bambust** bekiëktj het veural zakelik: "Eine partner miër of minder, det kumtj mich neet zoë nauw," leutj 'r opteikene. Wëe stëlle

veur òm aaf te wachte waat Gordon vindj van det nauw kômë...

Ein verrassing van formaot: ouch **Ilse Jacobs** duit mèt! "Ich bèn den waal eine volblood hetero," zeet het, "mer ich gaon hum probere te bekiëre. Dao heet neemes zoë ein oëthaojing es ich, en det kumtj tösse de lakes ouch good van pas."

Volges òs de groëtste kanshëbber is **Kaj**. "Ich gaon iërliek zeen, ich doon het puur veur het geldj. Deze kiër laot ich mich neet neije en kumtj alles good op pepeer. Ei paar maondj oppe tenj biëte en good get saus gebrueke, en den gaon wëe es kameraöj oët ein. Mèt de hëlftj van ziën vermoge bèn ich al dik kòntent!"



# GEWUËN MÔPPE

**Vital Houben** kumtj trök van **dokter Bullen**. Hèe heet slecht noëts. “Ich höb nog mer 24 oor te lèeve,” zeet ‘r tege **Kathleen**. “Zouwe wèe missjien nog ins seks kinne höbbe?” vreugtj hèn betueterdj. Nateurlik is Kathleen akkoord, en ze bedriëve de leefdje.

Ôngeviër 6 oor later, geit Vital opnoëw nao Kathleen: “Kinne wèe het nog ins doon, veur miëne tiëd is gekômme?”

Kathleen geit weer akkoord en ze doon het nog eine kiër. Weer get later, toen Vital al in béd laag en hèn op ziën horloozje keek, besefdje hèn det ‘r nog mer 8 oor te lèeve haaj. Hèn tikj Kathleen op heure sjouwer en vreugtj: “Estbleef sjat, nog eine kiër veur ich steff..”

Kathleen zuchtj ins en ze höbbe veur de dördje kiër seks.

Nao dit nummerke, viltj Kathleen wiej eine blok in slaop. Vital waas bezörgdj euver ziëne naderendj einde en liktj te woele en te dreije, tot hèn nog minder es 4 oor te lèeve heet. Hèn tiktj weer Kathleen aan, diej wakker weurdj: “Sjat, ich höb nog mer 4 oor, dinkse det wèe nog ins...”

Kathleen geit rechtop zitte en antwoordj: “Loëster, Vital, genôg is genôg. Ich môt mörgevreug opstaon en dich kins bliëve ligge!”



## EI GEHEIM RESEPT VAN POOL FRIT!

Ôzze eige **Pool Frit** zal eeder jaor ein van ziën geheim resepte priës gèeve diej hèn gebruekdje inne frituur vreuger, in Elkerlyck en inne Heerlijkheid.

Efkes good oplètte, want in deze Rabbedabber lègtj Pool uch van naoldj tot draod (of môtte wèe zègge van pan tot ketel?) oët wiej gèe kipfielee orieental klaor maaktj.



### Waat môjtj gèe hole inne winkel?

- Kipfilee.
- Kippeboejông.
- Uênje.
- Sjampiejôngs.
- Ananas
- Tematte of kèestematjes.
- Tematpuree.
- Kuriepoejer.
- Witte wiën.
- Volges ugge eige smaak: krielpat-tatte, èerpele, fritte of riëst.

### Waat môjtj gèe doon veur eine lek-kere kipfilee orieental a la Pool Frit oppe taofel te kriège?

- Sniej get uênj, sjampiejôngs en 2 sjuëve ananas.
- Kruj de kipfilee mèt pèeper en zaot, en bak hum gaar in get margarieneboter.

- Geet de boter weg, en kip de garnituur inne pan. Doot 'r nog mer good get kuriepoejer bie. Pool ziën favoriet merk daovan is Madras. Blus mèt ein klats witte wiën en bevochtig mèt kippeboejông. Laot alles good inkoke.
- Pak de kipfilee oët de pan en haaj ze good werm.
- Doot get tematpuree bie de saus, ming det good en bin mèt water en bloom of boter en bloom. Good laote inkoke en smaak bie mèt pèeper en zaot.
- Sniej de kipfilee in sjuëve, lèg d'r get ananas op en geet dao de saus euver hèer.
- Tip van de sjef: doot 'r bie het op taofel zette nog get kônjak op.

**SMAKELIK!!!**

## GEWUËN MÔPPE

### **Rik en Peter Fiddelaers**

staon mèt de otto nève **Patrick vanne Bandenshop** aan het roëd leecht oppe rink van Hasselt. Peter duit ziëne raam nao ônger. Patrick zuët det en dinktj: "Dèe wiltj mich get vraoge," dus hèe duit ouch ziëne raam aaf. Peter begintj drek te lache en reuptj: "Haha, Patrick! Ouch eine laote vleege?"

**Dirk Beijnsberger** is tege **Jaak Smeets** aan 't aafgèeve euver **Jack Kit**. "Dèe Jack Kit is toch zoë eine zeikerd hè. Wètse waat dèe mich lèst weer gefliktj heet? Ôm half 3 's nachts sting 'r op miën deur te bônke! Nog ei gelök det ich op det oor nog wakker waas: ich zaot te drumme!"

Waat is 14 mèeter lank en ruëktj nao pis? Eine polonèese oppe sinjorezitting in Biësel!

**Thieu van Geujen** en **Jean Snellen** zitte op ei benkske aane Goërt. Zeet Thieu tege Jean: "Kameraod, ich bèn aod en ich veul mich gebroke mèt zeurendje piën. Dich bès ouch al weer ei jaor aojer gewoore, wiej veuls dich dich noëw?"

Jean antwoordj: "Es eine pasgebore beebie. Ich hób gein tenj miër inne moël en ich geluif det ich zjust in miën bôks hób gesjeete.



**DIALEKTOËTZENDING  
RADIO MONZA  
16.00 - 23.00 ORE**

**GROËTE STOET  
ACHTERAAF AMBIANCE  
INNE FÔMFAREZAAL**

**VERKLËDJ BAL  
SPORTCAFÉ DE SJANS  
20.11 ORE - INKÔM GRATIS**

**PRINSEBAL  
PRINS HENDRIK I  
FÔMFAREZAAL - INKÔM GRATIS**

**FIBREWARIEJ**

2e wêk      Prinsesmaondj      2015 . 37  
zôn op 7:11      zôn ônger 18:1

**9**

MONZADAAG

**VRIËDIG**

**FIBREWARIEJ**

3e wêk      Prinsesmaondj      2015 . 37  
zôn op 7:11      zôn ônger 18:1

**11**

STOETDAAG

**ZÔNDIG**

**FIBREWARIEJ**

3e wêk      Prinsesmaondj      2015 . 37  
zôn op 7:11      zôn ônger 18:1

**12**

BA(A)LDAAG

**MAONDIG**

**FIBREWARIEJ**

3e wêk      Prinsesmaondj      2015 . 37  
zôn op 7:11      zôn ônger 18:1

**17**

PRINSEBALDAAG

**ZAOTERDIG**

